



PROPOSTA DE MODIFICACIÓN DO REGULAMENTO DE ESTUDOS DE DOUTORAMENTO DA UNIVERSIDADE DA CORUÑA (aprobado na Xunta de Goberno de 9 de xuño de 1999) PARA A SÚA ADAPTACIÓN AO REAL DECRETO 56/2005, DE 21 DE XANEIRO (a proposta da Comisión de Doutoramento)¹

**CAPÍTULO IV
SOBRE A TESE DE DOUTORAMENTO**

Artigo 15. A tese de doutoramento

As persoas que, unha vez obtida a suficiencia investigadora, aspiraren á obtención do título de doutor, deberá presentar e obter a aprobación da correspondente tese de doutoramento. A tese de doutoramento consistirá nun traballo persoal e orixinal de investigación sobre unha materia relacionada co campo científico, técnico ou artístico propio do programa de doutoramento.

Artigo 16. Director/a de tese

1. Para a elaboración da tese de doutoramento, o Consello de Departamento responsable do programa de doutoramento asignará ao/á doutorando/a un/unha director/a de tese, que será un/unha doutor/a con experiencia investigadora acreditada. A tese poderá ser tamén codirixida por varios/as doutores/as.

2. Para ser director/a de tese será necesario estar en posesión do título de doutor e ter vinculación permanente ou temporal con algún dos departamentos ou institutos universitarios que organicen o programa de doutoramento. Calquera outro/a doutor/a poderá ser director/a de tese, previo acordo da Comisión de Doutoramento.

3. Calquera cambio na dirección dunha tese esixirá a renuncia expresa do/a director/a desta. Caso de non producirse, o/a doutorando/a poderá solicitar, mediante escrito razoado ao Consello do Departamento responsable, o cambio de director/a de tese.

Artigo 17. Presentación do proxecto da tese de doutoramento.

Antes da obtención da suficiencia investigadora, unha vez obtida, ou acompañando á súa solicitude, o/a doutorando/a presentarán no Departamento correspondente un proxecto de tese de doutoramento avalada polo/a director/a ou directores/as desta, que consistirá nunha memoria explicativa do traballo que se pretende realizar. O proxecto de tese será sometido á aprobación do Consello do Departamento responsable nun prazo non superior a 30 días hábiles tras a súa presentación. A resolución do Consello comunicárase á Comisión de Doutoramento. En caso de resolución negativa, e a solicitude do/a alumno/a interesado ou do/a

¹ Sulíñanse as modificacións propostas.



seu/súa director/a de tese, a Comisión de Doutoramento poderá solicitar informes de persoas expertas no tema da tese e elaborará a correspondente proposta ao Consello de Goberno.

Artigo 18. Admisión a trámite de lectura da tese de doutoramento

1. Rematada a elaboración da tese de doutoramento, o/a director/a ou os/as directores/as desta autorizarán a súa presentación. Esta autorización deberá acompañarse á tese de doutoramento para a súa posterior tramitación. Cando o/a director/a da tese non sexa profesor/a do departamento responsable do programa de doutoramento cursado polo/a doutorando/a, o/a titor/a ratificará, mediante escrito razoado, a autorización do/a director/a para a súa presentación.

2. A tese de doutoramento redactarase en galego ou en castelán. En casos especiais, e após autorización expresa da Comisión de Doutoramento, poderase presentar noutro idioma dos oficiais en España, na Unión Europea ou en latín. Neste caso, a tese acompañarase dun resumo en galego ou en castelán, no que necesariamente se incluírá unha introdución, unha descrición da metodoloxía utilizada, as conclusións da tese e as contribucións máis relevantes desta.

3. A tese de doutoramento, tras a conformidade do Consello do Departamento responsable, presentarase á Comisión de Doutoramento que o comunicará a todos os departamentos e institutos universitarios. Para os efectos de dita presentación, o/a doutorando/a entregará no Rexistro do Terceiro Ciclo da Universidade dous exemplares da tese acompañados dos escritos de autorización do/a director/a ou directores/as da tese e do/a titor/a se proceder e coa conformidade do departamento responsable.

4. Durante un prazo de quince días lectivos, a tese permanecerá en depósito, un exemplar na Comisión de Doutoramento e outro no departamento responsable do programa, para os efectos de que calquera doutor poida examinala e, se for o caso, dirixir por escrito á Comisión de Doutoramento as consideracións que estime oportunas.

5. Cando, pola natureza do traballo de tese de doutoramento, non permitir a súa reprodución, o requisito da entrega de exemplares a que se refire o apartado 3 quedará cumprido co depósito do orixinal no Rexistro de Terceiro Ciclo da Universidade.

6. Transcorrido o tempo de depósito, a Comisión de Doutoramento, á vista dos escritos recibidos e tras a consulta ao departamento e aos especialistas que estime oportunos, decidirá se se admite a tese a trámite ou se, polo contrario, procede retirala.

Artigo 19. O tribunal de lectura da tese de doutoramento

1. Admitida a tese a trámite, o/a director/a do departamento correspondente solicitará da Comisión de Doutoramento, oído o/a directo/a da tese, o nomeamento do tribunal que ha de xulgalá.



UNIVERSIDADE DA CORUÑA

2. O tribunal encargado de xulgar as tese de doutoramento será nomeado pola Comisión de Doutoramento, de entre dez especialistas na materia á que se refire a tese ou noutra que garde afinidade con ela, propostos polo Consello de Departamento responsable, oídos o/a director/a da tese e os/as especialistas que a comisión estime oportuno consultar.

A proposta do departamento a que se refire o parágrafo anterior irá acompañada dun informe razoado sobre a idoneidade de todos e cada un dos membros propostos para constituír o tribunal. Neste informe farase constar, para os membros que non pertencen aos corpos docentes universitarios, a mención de "Doutor pola Universidade de..." e o ano de obtención do título. En todos os casos se especificarán os méritos máis relevantes que fan a cada membro idóneo para formar parte do tribunal.

3. O tribunal estará constituído por cinco membros titulares e dous suplentes, todos eles doutores, españois ou estranxeiros, vinculados a universidades ou organismos de ensino superior ou de investigación. Non poderá haber máis de dous membros do mesmo departamento, nin máis de tres da mesma universidade.

Os profesores pertencentes aos corpos docentes universitarios poderán formar parte dos tribunais de teses de doutoramento aínda que se atopen en calquera das modalidades da situación de excedencia e xubilación.

En ningún caso poderán formar parte do tribunal o/a director/a da tese nin o/a titor/a, salvo os casos previstos no artigo 12, apartado 2 do Real Decreto 56/2005, de 21 de xaneiro.

4. A Comisión de Doutoramento designará, entre os membros do tribunal, ao/á presidente e ao/á secretario/a. En caso de imposibilidade de actuación do/a presidente/a titular, este/a será substituído/a polo primeiro vogal e este/a polo primeiro suplente. En caso de imposibilidade de actuación do/a secretario/a titular, este/a será substituído polo terceiro vogal e este/a polo primeiro suplente. En todos os outros casos o primeiro suplente substituirá o primeiro membro que non poida actuar.

Artigo 20. Lectura da tese de doutoramento

1. Unha vez designado e constituído o tribunal a que se refire o apartado 3 do artigo anterior, o departamento responsable fará chegar, no prazo de dez días, a tese que ha de ser xulgada xunto co currículo do/a doutorando/a aos membros do tribunal.

A partir dese momento, os membros titulares do tribunal (ou os correspondentes suplentes, se algún dos membros titulares non actuara) disporán dun mes para enviaren á Comisión de Doutoramento un informe individual e razoado en que se valore a tese e se aprobe ou desaprobe esta. Á vista dos informes, a Comisión de Doutoramento disporá se procede ou non a defensa pública ou, se for o caso, a interrupción da súa tramitación. Nos casos de non autorización da defensa da tese a Comisión deberá comunicar por escrito ao/á doutorando/a, ao/á director/a da tese e ao Consello de Departamento responsable do programa de doutoramento as razóns da súa decisión.



UNIVERSIDADE DA CORUÑA

O/a director/a da tese de doutoramento poderá ser chamado/a pola Comisión de Doutoramento antes de decidir sobre o trámite a que se refire o parágrafo anterior, co fin de obter a información que se considere oportuna para fundamentar a decisión. En todo caso deberá ser oído antes de que a Comisión de Doutoramento acorde, se o fixer, que non procede a defensa da tese.

2. Unha vez denegada a realización do trámite de defensa da tese de doutoramento pola Comisión de Doutoramento, ou despois da súa defensa, o/a doutorando/a poderá solicitar certificación literal dos informes a que se refire o apartado 1 deste artigo.

3. O acto de mantemento e defensa da tese de doutoramento terá lugar en sesión pública durante o período lectivo do calendario académico e será convocado polo/a presidente do tribunal e comunicado polo/a secretario/a do tribunal á Comisión de Doutoramento con unha antelación mínima de quince días naturais á súa celebración, para a súa pública difusión. Coa mesma antelación anunciarase no taboleiro de anuncios do departamento correspondente e no do centro en que vai ter lugar o acto de defensa.

4. A defensa da tese de doutoramento consistirá na exposición polo/a doutorando/a do labor preparatorio realizado, a metodoloxía, o contido da tese e as conclusións, facendo especial mención das súas contribucións orixinais.

A defensa da tese de doutoramento realizarase no mesmo idioma en que esta estiver redactada. No caso de que a tese non estivese redactada en castelán nin en galego, o doutorando deberá ler no acto de defensa o resumo dela recollido no apartado 2 do artigo 18 deste regulamento.

5. Os membros do tribunal deberán expresar a súa opinión sobre a tese presentada e poderán formular cantas cuestións e obxeccións consideraren oportunas, a que o doutorando haberá de contestar. Así mesmo, os/as doutores/as presentes no acto público poderán formular cuestións e obxeccións, e o/a doutorando/a responder, todo iso no momento e forma que sinale o presidente do tribunal.

6. Rematada a defensa e discusión da tese, cada membro do tribunal formulará por escrito unha valoración sobre ela. O tribunal outorgará a cualificación global que finalmente concede á tese consonte a seguinte escala: "non apto", "aprobado", "notable" ou "sobresaínte". O tribunal poderá outorgar a mención de "cum laude" se a cualificación global é de sobresaínte e emítese, en tal senso, o voto favorable de alomenos catro dos seus membros.

En todo caso, a cualificación que proceda farase constar no anverso do correspondente título de doutor.

Artigo 21. Arquivo de teses de doutoramento

1. Unha vez superada a defensa da tese, o departamento remitirá á Comisión de Doutoramento un exemplar dela para os efectos de arquivo e documentación. Así mesmo, o departamento remitirá á Comisión de Doutoramento un exemplar da tese en formato electrónico e un resumo de



UNIVERSIDADE DA CORUÑA

200 palabras. O resumo incluírá unha relación de palabras clave e poderá estar escrito en galego ou español, e preferiblemente en estas dúas linguas e en inglés.

2. A Comisión de Doutoramento, á súa vez, remitirá ao Consello de Coordinación Universitaria, ao Ministerio de Educación e Ciencia e á Consellería de Educación e Ordenación Universitaria da Xunta de Galicia a correspondente ficha de tese.

Artigo 22. Publicación das teses de doutoramento

1. A Universidade da Coruña publicará en internet o resumo da tese de doutoramento ao que se fai referencia no artigo anterior.

2. No caso de que o/a novo doutor/a o autorice expresamente, a Universidade da Coruña tamén publicará en internet a tese de doutoramento.